



La Quotidiana
7007 Cuiria
081/ 920 07 10
www.laquotidiana.ch

Medienart: Print
Medientyp: Tages- und Wochenpresse
Auflage: 4'487
Erscheinungsweise: 5x wöchentlich

Themen-Nr.: 670.3
Abo-Nr.: 670003
Seite: 3
Fläche: 65'552 mm²

Projects sco exempels pigl avegnir

Impurtont premi per ils baghetgs dalla claustra e dall'agricultura a Mustér

DA HANS HUONDER / ANR

■ **Igl internat dallas studentas dil gimnasi dalla claustra, la stalla e la cascharia a Mustér obtegnan in dils premis principals dils inschigniers ed architects svizzers. Honorai vegnan quels edifecis – realisai sut la reschia digl architect lumnezian Gion A. Caminada – per lur concepziun progressiva.** En preschientscha dalla cussegliera federala *Doris Leuthard* e da 450 hosps ha l'Uniun svizra dils inschigniers ed architects surdau la gievgia sera a Turitg per la secunda ga il premi «Umsicht – Regards – Sguardi». Per la secunda ga suenter 2007 ha ella honorau lavurs innovativas che tegnan quen ton dils bases e dallas sfidas actualas, mo ch'ei era exempels per il svilup futur dil spazi da viver. Cun quei premi vul l'uniun promover la schientscha dils inschigniers ed architects da sefatschentar dalla formaziun d'edifecis en context cun lur contuorn e cun las cundiziuns digl ambient che semidan. Las novaziuns duein tener quen dalla qualitat pretendida oz ed egl avegnir. Tenor l'uniun pretendan quei soluziuns completas – in patertgar ed agir progressiv.

Inoltrau 48 lavurs

L'Uniun dils inschigniers ed architects svizzers ha surdau la gievgia ils premis per ils projects dalla viafier a Glatt/Turitg, il baghetg digl auditori Weichenbauhalle sigl areal da von Roll a Berna, la cas'aula alla via Weber a Winterthur, igl IUCN Centre Extension a Gland, la casa da habitar e fatschenta alla via Selnau a Turitg sco era igl internat dallas studentas dil gimnasi dal-

la claustra, la stalla e la cascharia a Mustér.

Plinavon ei vegniu surdau in premi da renconuschientscha per la reutilisaziun dil viaduct da viafier el circuit 5 dil marcau da Turitg e per la renovaziun totala dalla via naziunala el Plaun d'Ursera a Seedorf-Amsteg. Ils treis baghetgs sin intschess da Mustér che vegnan honorai dils inschigniers ed architects ein vegni formai e planisai da *Gion A. Caminada*. Tut en tut ein 48 lavurs vegnidadas inoltradas per la premiazion.

Igl october vargau ein 12 da quellas allura vegnidadas tematisadas el rom d'ina selecziun pli stretga entras la giuria consistenta da persunalitads oravontut dil sector dall'architettura. Ils objects eligi en quella selecziun ein vegni visitai da delegaziuns dalla giuria. Il november passau ha la giuria allura surdau ils sis premis principals e quels da renconuschientscha.

Dau novs accents

«Quei premi ei ina gronda renconuschientscha per soluziuns ch'ei daventadas pussevlas mo grazia alla cooperaziun da biaras e biars», di Gion A. Caminada da Vrin che ha dau il bul architectonic als treis baghetgs a Mustér. Fertion ch'il project per igl internat dallas studentas ei staus ina concurrenza, ein oravontut la stalla e la cascharia naschidas ord la ferma perschiasun ch'igl ei necessari da dar novs impuls economics: «La realisaziun digl internat ha procurau per fermes ligioms denter mei e la claustra e quella grondiusa basa da confidanza havein nus cunti-

nuau cun la planisaziun e realisaziun dils baghetgs per l'agricultura a Salaplauna.» Leu seigi semussau tgei che seigi pusseivel da contonscher en ina cuminonza, en in process interdisciplinar. Cun possibilitar ils baghetgs a Salaplauna hagi la claustra demussau siu senn da responsabladad per la regiun ed aschia dau clars accents all'agricultura ed il medem mument al svilup dalla regiun. «Igl ei denton era semussau ina ga dapli ch'igl ei pusseivel da cumbinar estetica cun l'utilisaziun da materials indigens. Quels materials ein da buna qualitat, han in grond potenzial ed ein da muntada culturala», di Gion A. Caminada.

Pusseivel e prudent

Sco quei che l'uniun dils inschigniers ed architects scriva en ina comunicaziun als mieds da massa muossan las lavurs premiadas claramein ch'igl ei pusseivel ozildi da procurar per ina formaziun progressiva e prudenta. Ils edifecis seigien rispostas exemplaricas e creativas sin damondas da relevanza pigl avegnir. Els seigien concepiti sco elements complets cun soluziuns che survarghien ils fatgs spirontamein tecnics ed ecologics. Las lavurs seigien resultats d'ina collaboraziun interdisciplinara cun risguard da sfidas socialas actualas e digl avegnir. Ils edifecis seigien economicamein da persistenza e promovien il svilup. Buc il pli davos seigien els denton era ina prestaziun culturala che corrispundi a fetg aultas pretendiuns dalla formaziun. Ils edifecis realisai a Mustér da Gion A. Cami-



La Quotidiana
7007 Cuir
081/ 920 07 10
www.laquotidiana.ch

Medienart: Print
Medientyp: Tages- und Wochenpresse
Auflage: 4'487
Erscheinungsweise: 5x wöchentlich

Themen-Nr.: 670.3
Abo-Nr.: 670003
Seite: 3
Fläche: 65'552 mm²

nada respandien d'ina vart il nez, dall'otra vart denton era las particularitads e tradiziuns regionalas e localas.

Cun las lavurs premiadas vul l'uni-un dils inschigniers ed architects buca furnir soluziuns exemplaricas e recepts per copiar e repeter. Mintga lavur premiada seigi ina risposta specifica e nuncumparegliabla sin damondas individualas e da connexs.



Igl internat dallas studentas dil gimnasi dalla claustra a Mustér ei in dils objects premiai.



La stalla e la cascharia regionala nova a Salaplauna tegnan quen dallas pretensiuns dall'economia agrara ed ein il medem mument exempels per la construcziun cun materials indigens.

FOTOS IL HUONDER